

# No Servus, Diener und Habe die Ehre!

Etze kummt dos

## Nej su wos

vu Sömde, n 06 Meje 2023



*O. Michael Siegmund*

---

## Telefon-Geschöchtn

Heutzutage sein jo de Telefone, die mr ömmer mit sich römtröhn kon, de sugenanntn Handys, aus unsn Labn nemieh wegzudenkn. Obr Ofang dr nontschr Juhre vun letztn Juhrhundert wor euch enner, dar uf dr Strousse ejfach hout telefoniern kenn, noch ane grüße Seltneht. Wie iech dou sannrzeit amoul drhejme ausn Fanstr kucke, stond doch glott a Mon mit enn dreisch Zantimetr grußn, tragborn Telefone om Gehsteige gegniebr und tote sich mit wan undrhahn, dan mr ne hout sahn kenn – wos fr a Wundr dr Technik!

A poor Juhre frieher hottn mr ei unsrer Wouhnung noch enn schworzn Telefonapparat mit Schnure und Wählscheibe. Wenn dou de Grußmuttr nabndro iebr uns a Gespräch reikrichte, mußte mr dan Menschn om andrn Ende vu dr Leitung sohn, ha sellte ei zahn Minutn noch amoul oruffn, weil dann de Oma, die an Rollstuhle soß, ei dr Zwischenzeit zu uns hout riebrrolln kenn und drnourn orscht zu enn Gespräche gerejt wor. Dorch die ock enn Mettr lange Telefonschnure wor mr salt halt räumlich sehr eigeschränkt.

Wie mr an sechtschr und siebtschr Juhn an Urlaube ei Italien oder sunst wu wor, hätte mr sich schunt su a Handy gewünscht zun drhejme meldn, doss mr gutt ogekumm wor und doss olles ei Ornung ös. Nej, salt hout mr sich bei dan drei, vier Telefonzelln om Campingplotze oder zun Telefonhäusl ei dr Pension ewich ostelln missn, öm amoul zu Hause Bescheid gahn zu kenn, wie's enn ols Urlauber grode su gieht.

Die Sache mit dar Telefoniererei hout ou, wie a jedes Ding, zwej Seitn. Mit dan neu-moudschn mobiln Apparatn ös mr halt ömmer und iebrole derreichbor, und wenn mr amoul personenlich ne zu sprechn ös, kenn enn de Leute ufn Oruffbeantwortr Nouchrichtn hintlossn. Frieher, wenn kejs ne drhejme wor, mußte halt dar Mensch om andern Ende vu dr Leitung su lange oruffn, bis mr wiedr dou wor und `n Hörer hout obnahm kenn. Arnewie worsch Labn sannrzeit schunt ruicher und entspannt, ols wenn mr, wie heutzutage, glei ban Hejmkumm uf zahn Nouchrichtn om AB reagiern muß. Ou hout de Speicherung vu ollen Kontaktdatn om Telefone drzu gefiehr, doss mr etze kejne Nummern mieh vu Freundn, Vrwandten und Bekanntn auswendich weiß, die mr frieher ömmer an Koppe hotte. Obr die sein etze halt ou elend lang gewurn.

Natierlich ös su a Handy schunt praktisch, zun Beispiele, wenn a Unfoll possiert ös und mr kömmt grode drzune. Dou kon mr glei a Sanitätsauto oder de Polizei telefonisch vrständichn. Ofte giehts jo dou öm Minutn, ob Ejs iebrlabn tut oder neche. Obr sunstrn ös de direkte verbale Kommunikation schun ziemlich zoricke gegangn. Sugor om Tiesch, wenn Olle beianandsötzn, ös dr Ejne oder Andere ofte ock ei sei Mobiltelefon vrtieft und ne osprechbor, weil abn genou etze „wichtsche“ Nouchrichtn ausgetauscht warn missn odr grode amoul schnell ane Beziehung per Whatsapp a Ende findt.

Su gesahn labn mr schunt arnewie ei merkwürdichn Zeitn, wos de zwischnmenschliche Kommunikation obelangt!

Mejntr ne ou ?

---